



COMUNICAT STAMPA

NVIT

LUIS PIAZZA y RAIMUND MUREDA

N ucajion di 110 ani dala nasciuda di doi artisć y dl cumpli di 60 ani dla Lia dl Museum Gherdëina

Luis Piazza y Raimund Mureda sarà i prtagonisć de na mostra speziela ti selfs dla Cësa de Cultura de Urtijëi che unirà giaurida n sada, ai 6 d'utober dala 11:00 y che resterà da udëi nchin ai 28 de utober 2018. La mostra ti va do ala fusties criatives de doi personaliteies zënzauter de gran mpurtanza per l svilup dla scultura y dla pitura te Gherdëina tl 20ejim secul.

Da una pert iel *Bera Raimund*, scultëur figuratif, che à laurà truep tla mauta cueta, dantaldut do l tēmp de stude cun l professëur Arturo Martini, y dal'otra pert, *Luis da Cudan*, che à laurà sibe tl ciamp dla scultura che te chël dla pitura y chël purtan a esprescion si criatività sibe te na forma figurativa che astrata.

I doi artisć ie liei l un cun l auter per avëi vivù tl medemo tēmp storich, ma nce per avëi tēut pert deberieda a n valguna tl cheder dl muviment artistich *L Ruscel* y per vester stac danter i cumēmbri dla fundazion dla *Lia Museum Gherdëina* metuda su tl 1958.

L dialogh dla mostra se cuncretisea te n percurs che mēt te na relazion strēnta i lēures di doi artisć, prejentei adum y regrupei te dejenëies, a na maniera che chi che ti cēla posse udëi cie che Piazza y Mureda à crià tla medema periodes dala formazion ti ani '30 ala madurtà o ai ultimi svilups ti ani '80, dala sperimentazions tecniches ai sojec crisc ora y nce ala nterpretazions defin persuneles.

La mostra ti va do ala formazions defrēntes tres scultures y pitures da culezions privates y nia cunesciudes, acumpaniedes da documēnc sciche lētres o menizles de anutazions. I lēures che l publich puderà amiré ie fac de materiai sciche l lēn, la mauta cueta, l bront o la piera de belerofon.

La mostra fej udëi pec crisc ora da duta la produzion de Luis Piazza y Raimund Mureda y ie unida metuda a jì dal *Museum Gherdëina* a Urtijëi, n culaburazion cun la families di artisć y cun tesć scric dala storica d'ert Danila Serafini Bertoldi. La

L'ucajion per lecurdé i doi artisć ie l 110ejim aniverser dla nasciuda de Luis da Cudan y bera Raimund y dl 60ejim aniverser dla fundazion dla Lia dl Museum Gherdëina, che ie l prim museum metù su te Südtirol do la viera.

La mostra resterà davierta nchin n dumënia, 28 d'utober, cun l orar de giaurida da lunesc a venerdì dala 15:00 ala 18:00 y sada y dumënia dala 10:00 ala 12.30.

Per nformazions:
Paulina Moroder
Museum Gherdëina
T 0471 797554
M 338 6040477
www.museumgherdeina.it